

Evening Dogri (NSD) Bulletin 21-04-2025

आकाशवाणी

खबरां ----

1. अमरीका दे उपराश्ट्रपति जे.डी वैंस 4 दिनें दे भारत दौरे पर अज्ज नमीं दिल्ली पुज्जे। अज्ज शामी चिरे उंदा प्रधानमंत्री मोदी हुंदे कन्नै मिलने दा कार्जक्रम ऐ।
2. प्रधानमंत्री नरेंद्र मोदी होरें 17में सिविल सेवा दिवस समारोह च हिस्सा लैता ते आखेआ जे पिछले 10एं ब'रें दौरान भारत नै सुशासन राएं असरदार बदलाव ते समग्र विकास गी यकीनी बनाया ऐ।
3. प्रधानमंत्री मोदी होर कल 2 दिनें दे साउदी अरब दौरे पर जेद्दा जा करदे न। पिछले 9 दाहकें च पैहली बारी कोई भारतीय प्रधानमंत्री जेद्दा जा'रदा ऐ।
4. झारखंड च सुरक्षाबलें ते नक्सलियें बश्कार छिडे दे इक्क टाकरे च 8 नक्सलवादी मारे गेन।
5. सुप्रीम कोर्ट नै पच्छिम बंगाल च वक्फ बिल गी लेइयै मची दी हिंसा दी पछोक्कड़ै च नीम फौजी बलें दी तैनाती आहली मंग गी खारज करी दित्ता ऐ।
6. आई.पी.एल च अज्ज कोलकाता दे ईडन गार्डनच कोलकाता नाइट राइडर्स दा मकाबला गुजरात टाइटन्स कन्नै होग।

<><><><><><>

अमरीका दे उपराश्ट्रपति जेम्से डेविड वेंस भारत दी 4 दिनें दी जात्तरा पर अज्ज नमीं दिल्ली पुज्जे। उन्दे कन्नै उन्दी घरै आहली उषा वेंस ते अमरीकी प्रशासन दे बड्डे अधिकारी बी ऐन। ओहू अज्ज संझा प्रधानमंत्री नरेंद्र मोदी हुंदे कन्नै मलाटी करंगन। उपराश्ट्रपति वेंस होरें अक्षरधाम मंदर च दर्शन कीते। उंदी जयपुर ते आगरा जाने दा बी कार्यक्रम ऐ। उंदे भारत दौरे दा मकसद दपक्खी सरबंधें दा जायजा लैने दे कन्नो कन्नी जंदी 13 फरवरी गी भारत ते अमरीका दे सांझे घोषणा पत्र दे नतीजे च हासल प्रगति दा आंकलन करना बी ऐ।

<><><><><><>

PM-CSD

प्रधानमंत्री नरेंद्र मोदी होरें आखेआ जे पिछले 10 बरें च भारत नै बाहे आहले बदलाव थवां अगगे बदिऐ असरदार परिवर्तन दिक्खेआ ऐ की जे सरकार मुलखै च समग्र विकास यकीनी करा करदी ऐ। उनें एहू गल्ल नमीं दिल्ली दे विज्ञान भवन च आयोजित 17में सिविल सेवा दिवस दे मौके पर कार्यक्रम गी संबोधित करदे होई आक्खी। प्रधानमंत्री होरें आखेआ जे 21 अप्रैल 1947 गी सरदार वल्लभभाई पटेल होरें भारतीय प्रशासनिक सेवा दे अधिकारिणं गी भारत दा स्टील फ्रेम यानि कि भारत दा फौलादी ढांचा करार दित्ता। प्रधानमंत्री होरें मुलख दे युवाएं, करसानें ते महिलाएं दी आसें-मेदें गी पूरा करने आस्तै असाधारण रफ्तार दी जरूरता दा जिक्र करदे होई आखेआ जे उन्दे सुखने अभूतपूर्व उच्चाइएं तगर पुज्जा रदे'न। मोदी होरें आखेआ कि जिनें नीतिणं पर उंदी सरकार कम्म करा करदी ऐ, ओहू अगले ज्हार बरें लेई भारत दा भविक्ख संवारने दा कम्म करडन।

<><><><><><>

SC-Pooja Khedkar

सुप्रीम कोर्ट नै भारतीय प्रशासनिक सेवा सवां बरखास्त कीती गेदी प्रोबेशनर पूजा खेडकर दे खलाफ सजा आहली कार्रवाई नेई करने दे अपने पैहलगे हुक्म गी 21 मई तगर अगडे बधाई दित्ता ऐ। उन्दे पर सिविल सेवा मतेयान च होरनें पिछड़े वर्गें ते विकलांगता कोटे दा गलत फैयदा ठोआने दा आरोप

ऐ। अदालतै खेड़कर गी पुच्छ-गिच्छ लेई 2 मई गी दिल्ली पुलसै दे सामने पेश होने दा निर्देश दित्ता ऐ। एहदे कन्नोकन्नी उनेंगी चेतावनी बी दित्ती ऐ जेकर उनें जांच च सहयोग नेई दित्ता तां एहदे उनेंगी गंभीर नतीजे बी भुगतने पौडन।

<><><><><><>

BJP Rahul Gandhi

भारतीय जनता पार्टी नै कांग्रेस दे सीनियर लीडर राहुल गांधी हुंदे पर अमरीका दी जात्तरा दौरान भारतीय चुनावs आयोग दे खलाफ कीती दिएं टिप्पणिएं गी लेइयै भारतीय लोकतंत्र गी बदना मरने दा आरोप लाया ऐ। अज्ज नमीं दिल्ली च इक प्रेस कांफ्रेंस च पार्टी प्रवक्ता संदीप पात्रा होरें आखेआ जे भारत च आजादाना ते निर्पक्ख चुनावs बवस्था ऐ ते इस बारै गलत प्रचार करना शर्म आहली गल्ल ऐ। उनें आखेआ जे राहुल होरें गी एह चेत्ता रखना लोडचदा ऐ जे ओह नेशनल हेराल्ड मामले च भ्रष्टाचार दे आरोपें दा सामना करा करदे न ते 50 ज्हार रपे दे मुचलके पर जमानत पर न। कल बास्टन च भारतीय मूल दे लोकें गी संबोधित करदे होई राहुल गांधी होरें आरोप लाया हा जे भारत च चुनावs आयोग हून निरपक्ख नेई रेही गेदा ऐ। संदीप पात्रा होरें आखेआ जे कांग्रेस पार्टी नै एह नमा बतीरा फगड़ी लैते दा ऐ कि जिस्सलै ओह चुनावs जित्ती जान तां चुनावs आयोग सेही होंदा जंदा ऐ-पर जिसले कांग्रेस हारदी ऐ तां उनेंगी आयोग दी निरपक्खता प शक होन लगी पोंदा ऐ। पात्रा होरें नेशनल हेराल्ड मामले कन्नै जुडे दे गुज्जखोरी आहले मामले पर कांग्रेस दी सख्त चुख्ताचीनी कीती ऐ।

<><><><><><>

Pop-Francis

रोमन कैथेलिक चर्च दे धर्मगुरू पोप फ्रांसिस हुंदा अज्ज वेटिकन सिटी च काल होई गेआ। ओह 88 बरें दे हे। जंदे किश हफ्तें शा ओह कसरी हे। पोप फ्रांसिस पैहले Letin अमरीकी पोप हे ते ओह सबबनें शा बड़ी उम्री च पोप बनने आहले व्यक्ति बी हे। तोआई, प्रधानमंत्री नरेंद्र मोदी होरें पोप फ्रांसिस हुंदे

निधन पर शोक व्यक्त कीता ऐ। इक्क सोशल मीडिया पोस्ट च श्री मोदी होरें आखेआ जे पोप फ्रांसिस गी दुनिया भरै च करोड़ां लोक करूणा, विनम्रता ते आध्यात्मिक साहस दे प्रतीक दे रूप च म्हेशां याद रक्खडन्ना। उनें आखेआ जे घट्ट उम्र थमां गै पोप होरें प्रभु यीशू हुंदे आदर्श गी साकार करने आस्तै अपने आपै गी समर्पित करी उडेआ हा।

<><><><><><>

PM-Saudi Arab Visit

प्रधानमंत्री नरेंद्र मोदी होर कल साउदी अरब दे 2 दिनें दौरे पर जेद्दा जाडन्ना। पिछले 4 दाहकें च एह कुसै भारती प्रधानमंत्री दा जेद्दा दा पहला दौरा होगा। साउदी अरब च भारत दे राजदूत सुहेल एजाज खान होरें प्रधानमंत्री हुंदे इस दौरे दे महत्व गी दस्सदे होई आखेआ जे श्री मोदी होर पहले 2 बारी साउदी अरब दा दौरा लाई चुके देन पर जेद्दा दी उन्दी एह पैहली जात्तरा होगा। उनें गलाया जे साउदी अरब कन्नै भारत दे रणनीतिक सरबंधें गी निगगर बनाने दियें कोश्टें तहत एह दौरा बड़ा महत्वै आहला ऐ। खान होरें आखेआ जे जेद्दा दौरे पर भारत ते साउदी अरब बश्कार रक्षा ते उर्जा सहयोग दे कन्नै गै इलाकाई ते वैश्विक परिदृश्य कन्नै जुडे दे नेकें महत्वें आहले मुद्दें पर बी गल्लकत्थ होने दी संभावना ऐ। उनें दस्सेआ जे साउदी अरब च 27 लक्ख भारती रौहंदे न, जेडे उत्थुआं दी अर्थ बवस्था च बड़ा योगदान देआ करदे ना। प्रधानमंत्री हुंदे इस दौरे दौरान साउदी अरब ते भारत बश्कार रणनीतिक सांझेदारी गी होर बी तगड़ा बनाने लेई नेकां अहम समझौतें पर बी दस्तखत होने दी मेद ऐ।

<><><><><><>

Jharkhand Naxal

झारखंड च अज्ज बोकारो दे लुगु पहाड़ी लाहके च पुलस ते अर्धसैनिक बलें बश्कार होए दे टाकरे च 8 नक्सली मारे गो। इस टाकरे च इक्क करोड़ रपे दा इनामी माओवादी विवेक बी मारेआ गेआ। झारखंड पुलस महानिदेशक अनुराग गुप्ता होरें दस्सेआ जे सुरक्षाबलें हूनै तोड़ी 8 माओवादिणं दे शव बरामद

करी लैते न। टाकरे आहली जगह थमां बड़ी मती गिनतरी च थेआर ते गोला बरूद बी बरामद कीता गेआ ऐ। श्री गुप्ता होरें दस्सेआ जे टाकरे दरान नस्सने च कामयाब होने आहले माओवादिएं गी बी घेरी लैता गेआ ऐ। उनें दस्सेआ जे गोलीबारी बंद ऐ पर तपाशी अभियान जारी ऐ।

<><><><><><>

Ramban-Rescue

जम्मू-कश्मीर दे रामबन जिले च बहल फटने ते पस्सियां पौने करी प्रभावत रामबन जिले च राहत ते बचाह कारवाई अज्ज बी जारी रेही। भारी बरखा, तूफान, ऐन गडा ते चानचक्क आए दे हाडें करी रामबन जिले च बड़ी मती तबाही मची ते बड्डे पैमाने पर नुक्सान होआ ऐ। 2 न्याणें सनें 3 जनें दी मौत होई गेई ऐ जिसलै दे सेंकडा बड्डे लोकें गी सुरक्षत बचाई बी लैता गेआ ऐ। जिला विकास कमीशनर बसील-उल-हक चौधरी हुंदी अगुवाई च जिला प्रशासन हालात पर नेडमी तक्क रखै करदा ऐ जिसलै जे पुलस, फौज, एस.डी.आर.एफ., एन.डी.आर.एफ. ते तुरत कारवाई आलिं टीमें दे इलावा केई गैर सरकारी संगठन बी बचाह कारवाईएं च रूज्जे दे न। राश्ट्री जरनैली सिडकें सरबंधी भारती प्राधिकरण दे अधिकारिं आखेआ ऐ जे सिडकै गी ब्हाल करने च घट्टोघट्ट इक हफ्तें दा समें होर लग्गी सकदा ऐ। तोआई खराब मौसम दे मद्देनज़र प्हाड़ी जिले रामबन ते डोडा च अज्ज एहतियात दे तौर उप्पर सब्भनें सरकारी ते निजी स्कूलें सने होरनें दुए शिक्षा इदारे गी बी बंद रखेआ गेदा ऐ।

<><><><><><>

NHW-Restoration

जम्मू-श्रीनगर राश्ट्री जरनैली शिडक एन.एच-44 जेहडी रामबन जिले च पिछले दिनें च बक्ख-बक्ख थाहरें पर हाड आने करी ल्हास-पस्सियां पौने करी बंद होई गेदी ऐ, इसी पूरी चाल्ली साफ करने ते खोलने लेई 2 दिनें तगर दा समां लग्गी सकदा ऐ। आकाशवाणी दे जम्मू संवाददाता नै जानकारी

दिक्ती ऐ जे रामबन दे डिप्टी कमिशनर बसीर उल हक चौधरी होरें आखेआ जे कल संझा जां फी परसों बडुलै तगर गड्डियें दी इक बक्खी दा आओजाई बहाल करने लेई लगातार जत्र जारी ना। डी.सी होरें एहू बी जानकारी दिक्ती जे जरनैली शिडकै पर कोई बी गड्डी इस्सलै नेई फसी दी ऐ। एहूदे शा पैहले कोई 140 गड्डियां बत्तै फंसी दियां हियां, पर उनेंगी सावधानी कन्नै बनिहाल आहली बक्खी टोरी दिक्ता गेआ ऐ तां जे यात्रुएं ते उन्दे परोआर आहलें गी कोई परेशानी नेई झल्लनी पवै। रामबन च जगह-जगह ल्हास पस्सियां ते कुप्पड पौने करी ते हाड औने करी राश्ट्रीय जरनैलीद शिडक कल्लै थमां गै बंद रक्खी गेदी ऐ।

<><><><><><>

CM-Ramban

जम्मू-कश्मीर दे मुखमंत्रि उमर अब्दुल्ला होरें आखेआ ऐ जे जम्मू दे रामबन जिले च बहल फट्अने ते ल्हास पस्सियां पौने करी शिडक दी हालत खास करी राश्ट्रीय जरनैली शिडक दी हालत बडी खराब ऐ। चानचक्क आए दे हाड करी त्रै लोक मारे गे, कई सारे घर, गड्डिएं गी नुकसान पुज्जा। उनें भरोसा दोआया जे राश्ट्रीय जरनैली शिडक गी बहाल करने दा कम्म युद्ध स्तर पर जारी ऐ।

<><><><><><>

Navy-Maldiv

भारतीय नौसेना नै मुम्बई च नौसेना दे डॉक्यार्ड च मालदीव दे तटरक्षक ज्हाज एम.एन.डी.एफ हुरवी दी मरम्मत दा कम्म कामयाबी कन्नै पूरा करी लैता ऐ जेडा दौनें मुखें बश्कार मजबूत कूटनीतिक ते सैनिक सहयोग दी सारत दिंदा ऐ। एहू मरमत भारत दी क्षेत्रीय समुंद्री सुरक्षा लेई बचनबद्धता दे रूप च क्षेत्रे च सब्बनें लेई सुरक्षा ते विकास लेई सांझी समावेशी ते समग्र उन्नति ते भारत दी गोआंडी सब्बनें शा पहलें आहली नीति दे तैहत कीती गेई ऐ।

<><><><><><>

SC-West Bengal

सुप्रीम कोर्ट नै अज्ज पच्छिम बंगाल च वक्फ बिल गी लेइयै मुर्शिदाबाद च भडकी दी हिंसा दी पछौक्कड़ै च नीम फौजी बलें दी तैनाती दी मंग आहली अर्जी गी खारिज करी दित्ता ऐ। मामले गी मौके पर गै सूचिबद्ध ते निर्देश देने दी मंग दा जिक्र जस्टिक बी. आर गवई ते आगस्टीन जार्च मसीह हुंदी पीठ दे सामने कीता गेआ। याचिका कर्ताएं नीम फौजी बलें दी तुरत तैनाती ते संविधान दी दफा 355 गी लागू करने दी मंग कीती। एहदे परते च जस्टि गवई होरें आखेआ जे अदालतै पर पैहले सवां गै कार्जकारी ते विधायी कम्में च दखल देने दा आरोप लाया जा'रदा ऐ। एह टिप्पणी हाल च गै सुप्रीम कोर्ट आसेआ राज्यपाल ते राष्ट्रपति होरें गी विधानमंडल आसेआ पास कीते गेदे विधायकें गी मिन्थी गेदी समें सीमा दे अंदर-अंदर मंजूरी देने दे निर्देश गी लेइयै भखे दे मुद्दे दे बारे च ही।

<><><><><><>

EPFO-Members

कर्मचारी भविष्य निधि संगठन (EPFO) नै इस बरे फरवरी तोड़ी कुल 16 लाख 10 हजार मिम्बरें गी अपने कन्नै जोड़ेआ ऐ। एह फरवरी 2024 दे मकाबले करीब 4 प्रतिशत दे बाद्दे गी दर्शादा ऐ। श्रम ते रोजगार मंत्रालय नै इस वृद्धि दा श्रेय बद्दे रोजगार दे मौकें, कर्मचारी लाह ते प्रति बद्दी जागरूकता ते कर्मचारी भविष्य निधि संगठन दी असरदार जनसंपर्क पैहलकदमिं गी जंदा ऐ। कर्मचारी भविष्य निधि संगठन दे डेटा मूजब फरवरी 2025 च करीब 7 लक्ख 39 हजार नमें सदस्य जोड़े गेन। डेटा कन्नै एह बी पता लगदा ऐ जे 18 थमां 25 बरे दी आयु वर्ग च 4 लक्ख 27 हजार नमें सदस्य शामिल होए न। इसै म्हीने दौरान करीब 2 लक्ख 8 हजार महिलां सदस्य बी एहदे च शामिल होए न। इंदा बाद्दा बी पिछले बरे इस अवधि दे मकाबले च 1 इशारिया 2-6 प्रतिशत मता ऐ।

<><><><><><>

IPL

मुम्बई च आई.पी.एल क्रिकेट च कल मुम्बई इंडियन्स नै चेन्नई सुपर किंग्स गी 9 विकेटें कन्नै हराई दित्ता। पैहले बल्लेबाजी करदे होई चेन्नई नै तय 20 ओवरें च 5 विकेटें दे नुकसान पर 176 रन्ज बनाए। परते च मुम्बई नै 15 ओवर ते 4 गेंदें च 1 विकेट मुहाइयै 177 रन्ज बनाइयै मैच अपने नांऽ करी लैता। अज्ज इडन गार्डन कोलकाता च कोलकाता नाईट राइडर्स दा मुकाबला गुजरात टाइटन्स कन्नै होग। मैच संझा साङ्गे 7 बजे शुरू होग।

<><><><><><>

BCCI-Contract List

भारतीय क्रिकेट कंट्रोल बोर्ड नै 2024-25 सत्र आस्ते जारी अपनी अनुबंध सूची च रोहित शर्मा, विराट कोहली, जसप्रीत बुमराह ते रवींद्र जडेजा गी ए-प्लस श्रेणी च रक्खेआ ऐ। श्रेयस अय्यर गी बी श्रेणी च ते ईशान किशन गी सी श्रेणी च रक्खेआ गेआ ऐ। अंतरराष्ट्रीय क्रिकेट थमां संन्यास लैने आहले रविचंद्रन अश्विन दी जगह ऋषभ पंत गी ए श्रेणी च शामिल कीता गेआ ऐ। नीतीश कुमार रेड्डी, ध्रुव जुरेल, अभिषेक शर्मा, सरफराज खान, आकाश दीप, वरुण चक्रवर्ती ते हर्षित राणा गी सी श्रेणी च रक्खेआ गेआ ऐ। बोर्ड ए प्लस श्रेणी दे खडारिएं गी 7 करोड़, ए श्रेणी दे खडारिएं गी 5 करोड़, बी क्रिकेटरें गी 3 करोड़ ते सी श्रेणी के खडारिएं गी 1 करोड़ रपे सलाना दिंदा ऐ।

<><><><><><>

MP-Road Accident

मध्य प्रदेश दे रायसेन जिले च भोपाल जबलपुर सड़कै पर इक तेज रफतार जीप इक पुली कन्नै बज्जियै 10 फुट डूंगी खड्डे च जाई पेई जेदे कारण एहदे च सोआर 6एं जनें दी मौत होई गेई। रायसेन दे पुलस अध्यक्ष पंकज कुमार पांडे होरें दस्सेआ ऐ जे मरोने आहलें च 2 महिलां, 1 बच्ची ते त्रै मर्द शामिल ना। शुरूआती जांच च पता लग्गा ऐ जे डरैवर गी नींदर दा फंडाका लग्गने कारण एह हादसा पेश आया।



IMD-Weather

मौसम विभाग नै अगले 5 दिनें तोड़ी मध्य भारत च गर्म ब्हाएं चलने दी पेशगोई कीती ऐ। 25 तरीक तगर पूर्वी राजस्थान, मध्य प्रदेश, विदर्भ ते छत्तीसगढ़ च बी लू चलने दी संभावना ऐ। अगले 3 दिनें दौरान मध्य भारत ते गुजरात च बहोबद् तापमान 2 डिग्री सेल्सियस बदने दी मेद ऐ। तोआई, 26 तरीख तगर पूर्वोत्तर भारत च तेज बरखा जारी रौहग। विभाग नै 7 दिन दौरान कर्नाटक, तटीय आंध्र प्रदेश, तमिलनाडु, पुडुचेरी, कराईकल ते तेलंगाना च गरज, बिजली ते तेज़ ब्हाएं कन्नै बरखा दा बी अनुमान लाया ऐ।

